

# Pauro Timoteo bo tapara ziwatahaka

Timoteo Pauro tuk zinymyrykya, iwaze Pauro Timoteo zerikikze papeu ibo ziwatahaka. Hawa Sesus tuktsa nisipokzitsiki iwatahi ispirikpowy ibo ziwatahaka. Deus hyrikoso Pauro ziapewywy iwaze katsa kino niwatihi ana humo hi tanymyryky.

---

**1** <sup>1</sup>Uta Pauro. Timoteo abo piwatahaka. Kiristu Sesus zikykhohik. Sesus Kiristu Deus tazo bo mymyoktyhyrykta niwatihi zikpehahiknaha iwatahu iakzohota my. Sihumo Deus wasania ty mopamykysoko. Katsa Sesus humo mspihikrëtsa. <sup>2</sup>Ikiakta katse wata. Ikiak katuk Sesus humo aspihikporëta. Deus pe my:

— O Deus kazo Timoteo humo tyzipokzitsikita iwatahi kytsa nasipokzitsi. O kazo Kiristu Sesus mypehatsa humo niwatihi ahahumo tsakurëta mykara — my.

**Kytsa asahi tahaspirikpowy baratyty mynakananaha  
asa bo hi — niwazuba pyktaha — tsimy.**

<sup>3</sup>Ikiak Epeso eze tsimytare. Nezeba Masedonia bo niukuruze ape:

— Ikiak Epeso eze tsimytare tsihikik iki. Abaka atsatu mykara Epeso tsimytare iwatahi asaktsa nisihyrinymyrykynahatsa asahi mybarapetu nikaranaha tysi-pehahik. Amy baratyty mysihyrinymyrykynaha. Deus harere batu mysihyrinymyrykynaha tahaharere ty zuba kytsa bo mysihyrinymyrykynaha. Iwatahi ikiak tysi-pehahik ispe tsimy:

“O meky watu tsimysihyrynimyrykynaha. Niwazuba pyktaha! Ahahyrynimyry byziki tsimy. <sup>4</sup>Ahazotsa niakbakaranahatsa soho ty ka soso byitaha. Amy sinaro nikaranaha ana soho ty ka soso byitaha. Anatyhi tsimypamykysokonaha zeka kytsa Deus harere bo hÿ ahabyitsa. Tsimyhapepehakanaha zuba. Deus mybo tsimysapyrëta ja mykaranaha, iwa motsasokonaha. Iwahatu ahazotsa harere ty ka soso byitaha” tsimy — my.

Iwa sibo tsimytsasoko. <sup>5</sup>Iwa sibo tytsaso iwatsahi simypokzitsirëtsa mynakananaha. Simysapybyitsa soho humo batu mytsaty mykaranaha

zeka simypokzitsirêtsa mykaranaha. Sesus humo mospirikpotohinaha zeka, kytsa humo simypokzitsiukrêtsa mynakaranaha. Deus harere bo hyÿ mykaranaha zeka iwaze kytsa humo simypokzitsirêtsa. <sup>6</sup>Kytsa ahatukze kaharere humo batu siakparawy. Asahi batu wasani zikaha. Kytsa mekta ske buruk tu myzaranahaze tsa watsa moziknaha. Myzaranahatsa tihi:

— Hâta sa iske — maha, tsawatsa kytsa Deus soho mopamykysokonaha zuba. Hawa mospirikpo maha. Asahi saksoho humo piwabynaha zuba ana humo hi siakparawy. <sup>7</sup>Asa kino kytsa mysihyrinymyry tshikiknaha. Mahani. Moises harere ty mysihyrinymyrykynaha batu zikaha. Amy ty motsasokonaha ana humo hi batu sihyrinymyry. Batu wabyziuhu zikaha iwatsahi batu sihyrinymyry. Motsasokonahaze:

— Katsaktsa myhyrinymyrêtsa — asaktsa mybarapetu mykaranaha, iwatsahi waby waby byitaha.

<sup>8</sup>Deus harere ana hi Moises ziwatahaka tisapyrêna my. Ana humo hi myhyrinymyrêtsa. Ana humo kino mytsaty tsimaha zeka wasani tsimaha. Ana humo hi hyÿ tsimaha zeka wasani tsimaha. <sup>9</sup>Iwahatu Deus harere ty Moises pe niy. Astatu Moises iharere ziwatahaka. Kytsa simysapybyitsa mykaranaha asa bo hi ziwatahaka. Kytsa batu simysapy asa bo hi ziwatahaka. Kytsa batu wasani mykaranaha asa bo hi ziwatahaka. Taparaka Deus harere ty sibo nyny niy. Kytsa iharere humo batu siakparawy. Kytsa mypehatsa harere bo batu yhÿ niaha. Kytsa Deus humo batu sispirikpo, asaktsa simysapybyitsa nikaranaha. Asahi tahazotsa nasibakanaha, ustsá kytsa kino niwatihi nasibakanaha iwatahi sibo ziwatahaka. Taparaka Moises Deus harere ziwatahaka.

<sup>10</sup>Kytsa ustsá okeza nasihuahuanaha, wytykyryk kino niwatihi asizahi tahawaktykyryk pytsa batu iktsa zuba zikaha. Kytsa naharapewowokonaha. Asahi jabyitsa nasiaksekenaha. Kytsa okyrysaro yksetsitsa sityhyryboarêtsa maha. Simyspihikbatanikitsa. Siharerewabymybarêtsa bo imysapybyitsa mykaranaha iwa asa kino zuba Deus harere ziwatahaka, ana humo hi hyÿ maha zeka tahamysapybyi pimoewynaha. <sup>11</sup>Deus kape niy:

— Wasania ty tytsasokta! niy. Nanabyitaba kaharere tytsaso niy. Anaharere zuba motsasoko. Ana pe wasani ty my. Deus imysapyrênikita, ata zuba wasani mykara — niy.

### Hawa Deus Pauro zipokzitsiki.

<sup>12</sup>Kiristu Sesus mypehatsa kape niy:

— O ikia zawatawy iwaze tsimysapyrêta tsimozik. Iwaze nanabyitaba kasoho wasani tsimytsasoko iwa katsyhyryze tarabajatykta tsipiktsumuêhÿ — niy.

Kyze Sesus tazikwy ty kabo nyny niy iwahatu isoho wasani motsasoko. Atahi kahumo tsimypokzitsiukrêta iwatahi kakurêta. <sup>13</sup>Taparaka

ihumo batu kakparawy. Sesus tuktsa ziknasisukyryky, Sesus kino batu kakparawy. Deus batu kanyhy. Kaspirikpobyita hi batu kahyrinymyry. Atahi iwata tu mozikpokzitsiki. <sup>14</sup>Iwaze mypehatsa uta kahumo tsimypokzitsiarêta. Ihumo kaspirikporêta ikyzik. Abaka ustsá kytsa humo kamypokzitsiarêta ana humo hi zikyrynymyryky. Kiristu Sesus tuk tsinapykyryknahaze iwa tsimyzurukunaha. <sup>15</sup>Katsa hi:

— Sesus Kiristu mybarawy bo inasik. Kytsa simysapybyri humo izumu. Zumuze kytsa asahi tahamysapybyri pimoewynahaze asa kino Deus bo mysiockyhyryk nikara — iwa tsimytsasokonaha. Wasi my. Utakta kamysapybyita tu ikykara Deus Sesus humo zikyokzohik niy.

<sup>16</sup>Sesus Kiristu kahumo tsimypokzitsiarêta. Mahani ziksininitshikik. Iwatahi kahumo batu iakyri. Uta ihumo kaspirikporêta ana humo hi zikperyky. Zikperyky zeka ustsá bo niwatihi mysiperyky. Utakta kamysapybyita ikykara kahumo ziperyky iwaze ustsá bo niwatihi taperyky. Deus ustsá pe:

— Pauro imysapybyita ziknakara. Utakta batu pimiywy kasopyk. Iwatahi mozipokzitsiki — niy. Aba kytsa Sesus humo batu sispirikpo kahumo Deus harere bo hỹ maha. Hawa Deus kahumo isopyk asahi Sesus humo sispirikporêtsa h̃y. Deus tuk mynapykyryknaha niwatihi. Mytuk ibaze mynapykyryknaha.

<sup>17</sup>Iwaze Deus bo tsimypamykysokonahaktsa!

— O Deus ikia zuba tsamysapyrêta h̃y. Aharere pykyhytuty tsiwabyziunaha. Tubabatu ikia taparaktsa pehatsa tsiky. Abaka katsa mypehatsa tsmozik. Mytsekokatsa pehatsa tsmozik niwatihi. Ikia zuba awahi koikny baktatu. Katsa abo ba zikozonaha. Ikia zuba awahi tsimynapykyryk batu aty tohi awata. Iwatsahi katsa abo ikia zuba abazubata tsimy, bjoikpe eze mybarawy eze kino niwatihi abazubata tsimy, ikia zuba wasani tsimy kara — tsimaha.

Iwa tsimypamykysokonaha.

<sup>18</sup>Iwaze Timoteo ikia katse wata. Iwatahi pahyrinymyry. Tubabatu Deus sohokotsitsa abo nitsasokonaha, siharere bo hi mytsatyzotyktá! Siharere bo mytsatyziu tsimy zeka Sesus humo tarabajaziu tsimy kara. Kytsa aharere humo tahamysapybyri pimoewykynaha. Iwatahi ikia sodadu wata ikia hi amy ty isapybara tsipimoewyky. Hawa sodadu sisukyrytsitsa bo niwatsorokonaha ikia isapybara humo batu yh̃y tsimy kara.

<sup>19</sup>Deus harere bo hỹ tsimy kara. Batu pyk ziky. Amy ty wasani my tsihyrynymyrêta. Atsatu tsimy kara. Ustsá kytsa usa wasaniha humo batu sihyrynymyry. Iwatsahi wasani ha humo batu yh̃y zikaha. Asahi Sesus humo batu sispirikpo. Tsaraha pihik bo moharazuk ezekta hyritywata. Sesus humo sispirikpobyitsa tu iwatsahi iharere humo batu ma zikaha. Hawa tsaraha niharazuk asahi Sesus humo sispirikpobyitsa ziknakaranaha.

<sup>20</sup>Situk tu makutsa petoktsa maha. Estuba Himeneu inarokota usta Aresādere inarokota. Iwaze ispe iky:

— Ikiahatsa Satanas harere bo yh̄y tsimykaranaha. Atahi za ahapehatsa mozik — iky. Iwa nitsasoko. Deus soho zisapybyrikinaha, kaharere humo mopyk tshiknaha iwatahi iksibetsakak. Deus soho humo batu zikaha iwatahi iksibetsakak tozeka ja aibani Sesus humo mospirikpozonaha iwa mytsaty iky.

**Hawa Deus bo tsimypamykysokonaha ana soho hi piwatahaka.**

**2** <sup>1</sup>Tapara ahape my:

— Deus bo typamykysonahaktsa! Myzubaha tsyhyryze Deus bo typamykysonahaktsa.

“O Deus tysitsumuēh̄ikī tsimaha. O myzo sihumo tsimpokzitsiarēta tsimaha. Ikia zuba wasani tsimykarā” tsimykaranaha — iky.

Iwa ibo tsimypamykysonaha. Kytsa tsyhyryze Deus bo tyzapykykynahaktsa! Amy tisapyrēna anahi itsyhyryze tsimyzapykykynaha.

<sup>2</sup>Mypehatsitsa tsyhyryze Deus bo typamykysonahaktsa. Sihudikhudikwy pehaksitsa tsizubarēna tsyhyryze Deus bo typamykysonahaktsa. Iwa hi:

— O Deus mypehatsa myhumo simypokzitsiukrētsa h̄y. Iwatsahi mykurētsa tsimaha. Ba zikahapetsaknaha kyzeakta tsimykaranaha. Katsa mykurētsa zuba tsimoziknaha. Deus harere bo zuba hȳy tsimykaranaha iwaze wasani tsimykaranaha — tsimaha. <sup>3</sup>Katsa tsimiharape pokzitsikinaha zeka Deus tsakurēta. Deus mymyoktyrykta my takino myhumo tsakurēta. Utsa kytsa kino niwatihi myharape pokzitsikinahaze tsakurēta h̄y. <sup>4</sup>Myzubaha Deus humo sispirikporētsa moziknaha ana hi mozihikik. Iharere wasani my kytsa iharere piwabynaha anahi mozihikik. Iharere bo hȳy maha zeka sinini ykarawy bo ba zikmypeha. Iwathatu myzubaha iharere bo hȳy maha mozihikik.

<sup>5</sup>Iwatahi Deus babata ikaha tahi zuba. Kytsa simysapybyritsa humo takyriki. Iwaze Sesus Kiristu mytsapuhyripyrywyta mybarawy bo inasikze maku niyzik. Nihyrikosokda kytsa zibezena. Nihyrikosokdaze kytsa simysapybyitsa nikaranaha iwatsatu nisiokzo. Atahi mysapyzeka nihyrikosokda ata zuba myhumo. <sup>6</sup>Iwatahi Sesus humo Deus ba ziktakyri. Iwa Sesus humo Deus kytsa ty batu ziktakyriwy. Deus wasaniha nitsaso tshikikze Sesus nihyrikosokda naha soho nitsasoko. Sesus nihyrikosokda ana humo hi kytsa sihyrinymyrētsa. Deus bo mysioctyhyryk h̄y ana humo kino sihyrinymyrētsa. <sup>7</sup>Deus zikpeha kakzohota mozik. Iharere motsasoko ana humo hi zikwatawy. Kytsa Sudeutsabyitsa mysihyrynymyryky sibo zikykhohik. Wasi my. Kamyspihikbatabyita mykara. Ata hi:

— “Ikiahatsa Sesus humo ahaspirikporêtsa tsimoziknaha” ispe tsimy iwa kape niy: “Iharere bo hyĩ tahaktsa kytsa” ispe tsimy: “Iwa kape” — niy. Iwa.

<sup>8</sup>Iwaze abo motsasoko. Kytsa hudikhudikwy eze tu Deus bo typamykysonahaktsa. Izumubanhaze Deus bo mopamykysokonaha. Simysapyrêtsa tahatsipatsa ty jobo bazuzu sisopyk iwa Deus bo mopamykysokonaha. Sibetsakokbyitsa Deus bo mopamykysokonaha. Siakyriukbyitsa kino niwatihi mopamykysokonaha. Izumubanhaze Deus bo mopamykysokonaha.

### Wytykyryk Sesus humo sispirikporêza.

<sup>9</sup>Wytykyryk kino niwatihi. Sesus humo sispirikporêza. Tahasuk ty korobyk mahaze sisapyrêza moziknaha. Sisuk wasani my zeka kytsa batu sibo iksaziu zikaha. Siharadi meky watu batu mykaranaha iwatsahi kytsa sibo batu iksaziu zikaha. Sinaha tisapyrêna. Sisuk tsipokzitsarêna ty batu korobyk zikaha. Sisuk tsiziurêna korobyk maha. Iwatsahi kytsa sihumo batu iksaziu zikaha. Wytykyryk tahasuk soho bo batu mytsaty zikaha. Hawa sizubarêtsa mysipokzitsinaha mytsaty maha. Ana bo hi mytsaty maha. <sup>10</sup>Wytykyryk motsasokonaha:

— O katsa za Sesus humo mospirikpoza tsimaha — maha. Asizahi pipokzitsikinaha zeka kytsa sisoho:

— O siza hi simysapyrêza hỹ — maha.

<sup>11</sup>Sesus tuktsa izumubanhaze wytykyryk tahabyri mopykyryknaha. Ahatuk ka soso byitaha:

— O katsaza myhyrinymybyiza iwazahi waby zuba — mykaranaha. Iwa soso byitaha. Asiza mypehatsa harere pinymyryknaha. <sup>12</sup>Kytsa bo amy batu imysapybara ty ka isty spirikpo spirikpo byitaha! my. Iwa wytykyryk pe my. Asiza kytsa ba ziksipehanaha. Asiza pe my — Ikiahaka ahabyri ahakso byitaha — my.

<sup>13</sup>Iwa asiza bo motsasoko. Tapara Deus Adão nizukni. Iwaze Ewa nizukni. <sup>14</sup>Hyríkoso sapybara pehatsa Satanas inarokota Adão bo mybarapetu niy. Wytyk zuba iharere humo yhỹ niy. Barapetu niyze atatsa iharere humo yhỹ niy. Atatsa hi tapara Deus harere bo batu ma niy. <sup>15</sup>Iwazahi simyitsapyrêza. Ibykyhy mopurukze ky tsapyriwa. Siza Sesus humo mospirikponaha zeka tahahyrytsa tuk sakurêza moziknaha. Utsa humo mysipokzitsikinaha zeka sakurêza moziknaha. Tahasuk ty korobyk maha zeka tisapyrêna mozurukunaha Deus asiza mysiokythyryk. Tahamysapybyri pimoewynaha zeka Deus mysiocko. Iwa hỹ.

### Sesus tuktsa sispirikpokonahatsitsa soho motsasoko.

**3** <sup>1</sup>Myspirikpowyhani baba wabytoktotaha! — Aty Sesus tuktsa pehakatsa zispirikpokota mozihikik zeka wasani my — my.

<sup>2</sup>Iwaze atakta bazimyi. Wasani mozuruku. Iwa zeka atakta estuba zubatatsa piakse. Batu paikpa mytsaty ziky. Utsa harere piwabyziu. Kytsa iwahoro bo pomonahaze:

— O kawahoro bo pakutyny. Awanu tyhāity — my. Mypehakatsa Deus harere ty kytsa mysihyrinymyryziuku.

<sup>3</sup>Kytsa opuwy tsōsī ba ziku. Kytsa ba ziksike. Ba ziktasakpare. Atahi kytsa humo tsimypokzitsiukrēta. Utsa kytsa okyrysaro ba ziaксе.

<sup>4</sup>Namyspirikpokotsa tahahyrytsa mysipokzitsiki. Tahyrytsa iharere bo ma mykaranaha. Tahyrytsa simysapyrētsa maha. <sup>5</sup>Tahyrytsa humo impokzitsi byizeka iwaze Sesus tuktsa humo kino niwatihi batu impokzitsiuk. Tahyrytsa humo impokzitsi byizeka Sesus tuktsa mozumubannahaze ba zikspokzitsi batu ziky.

<sup>6</sup>Maku Sesus humo abaka iharere bo yh̄y mykara batu mysipirikpokotsa zikyzik. Ata kino mypehakatsa Sesus tuktsa tuk batu ziwatawy. Mypehakatsa Sesus tuktsa tuk tsiwatawy zeka batu imysapy my. Atahi mytsaty mykara:

— O uta mypehakatsa my. Kytsa kaharere ty mysipirikpo uta zuba wasani my zeka — my. Iwa mytsaty mykara. Tubabatu hyrikoso sapybara pehatsa Satanans inarokota atsatu mytsaty nikara.

— O uta zuba wasani my — nikara. Iwatahi Deus ipe niy:

— Batu ba. Ikia batu amysapy — niy. Iwaze Sesus humo isipirikpoziubyita mozik zeka Satanans wata mozik. Deus tihi — Ikia batu amysapy tsimy — niy.

<sup>7</sup>Maku Sesus tuktsa namyspirikpota mozik zeka kytsa sizubarētsa isoho humo piziukunaha. Asahi Sesus humo batu sispirikpo mykaranaha:

— O atahi tsimysapyrēta iharere tsiwabykynaha — maha. Kytsa sizubarētsa iharere humo siakparawy byizeka tisukatsihikrēta mozik. Tisukatsihikrēta zeka jokaraharēta hyrity wata. Irara tawerykywy bo mynatsukze ba zikzoihik iakubyri mozumuze ta wata kytsa sizubarētsa sispirikponahatsa soho zisapybyrikinahaze siakubyri mozumu niwatihi. Satanans werekywy hyrity wata bo mynatsuk. Iwatahi kytsa isoho tihi:

— O atahi tsimysapyrēta. Wasani my — maha. Iwaze isukatsihikbyita mozik.

### **Sesus tuktsa tsumuēhītsitsa soho motsasoko.**

<sup>8</sup>Abaka Sesus tuktsa tsumuēhītsitsa soho piwatahaka. Asahi sitsumuēhītsitsa namyspirikpokotsa watsa mozurukunaha. Kytsa sisoho:

— O asaktsa simysapyrētsa — maha. Sitsumuēhītsitsa harere wasani mykaranaha. Ba zik mospihikbatanaha. Kytsa opuwy tsōsī ba ziku. Utsa kytsa namy ba zikzihiknaha. Okyrysaro ba zikzihitsa naha. <sup>9</sup>Taparaka kytsa Deus harere humo ka batu sihyrinymyry. Abaka sihyrinymyrētsa. Deus sibo taharere nitsasoziuku, sitsumuēhītsitsa harere humo sispirikporētsa. Iwatsahi wasani mykaranaha mospirikpokonaha.

<sup>10</sup>Tsikzumubanhaze sitsumuêhĩtsitsa soho humo tsimypamykysokonaha. Ikiahatsa hi:

— O atahi wasani mozuruku ja tsimysapyrêta ja — tsimaha. Iwa tsimypamykysokonaha. Kytsa isoho humo yhỹ maha zeka tsimysapyrêta hỹ. Iwaze sitsumuêhĩtsa mozik.

<sup>11</sup>Sitsumuêhĩtsitsa okeza kino niwatihi simysapyrêza maha. Ba zikaha pisohonaha. Ba zikaha pimiyjanaha. Batu paikpa mytsaty zikykaranaha. Wasani mykaranaha. Wasape ha zuba motsasokonaha. <sup>12</sup>Sitsumuêhĩtsitsa tasukza zeka wasani maha. Estuba zuba tatsa piakse, iokeza petokuruk zeka batu imysapy my. Maku petok okeza zeka ba ziwatawynaha. Sitsumuêhĩtsitsa hyrytsa siharere bo yhỹ mykaranaha. Iwahoro ezektsa sisopyk wasani mykara. <sup>13</sup>Sesus tuktsa nasitsumuêhĩkĩnaha zeka kytsa sisopyk tisapyrêna maha. Deus wasania ty ustsya kytsa bo motsasokonaha. Batu sisikpyby. Sisikpybybyitsa Deus wasania ty Sesus soho motsasokonaha.

#### **Taparaka batu myhyrinomyry abaka myhyrinomyrêtsa.**

<sup>14</sup>Aba Timoteo abo piwatahaka. Iwaze zuba abo mynakozore tsihikik. <sup>15</sup>Hawa my zeka aibani zuba abo mynakozore iwatahi papeu abo piwatahaka. Anapapeu humo iwatahaha tsipinyze hawa tsimyzuruku ana humo hi ahahyrinomyrêtsa tsimoziknaha. Deus tyryktsa mozumubanhaze Deus wahoro hyrity wata maha. Wahoro harakurukwy wata tyrikto niy ba ziknatsihyrikpetok. Iwa Deus tyryktsa iharere bo hỹ mykaranaha iharakurukwy watsa sipunihikrêtsa moziknaha. Deus harere bo hỹ mykaranahaze ituk tahawahi mynapykyryknaha. Batu simiywy sipunihikrêtsa moziknaha.

<sup>16</sup>Kytsa Sesus humo batu sispirikpo. Hawa katsaktsa Sesus humo myspirikporêtsa ana humo hi batu sihyrinomyry. Sihyrinomyrybyitsa tu Deus wasaniha ahabara ty sihumo tsihokdahaerêna. Abaka batu. Abaka katsa myhyrinomyrêtsa. Abaka Sesus Kiristu sibo motsasoko. Sesus maku wata niyzik. Deus hyrikoso isoho hi:

— O ikia wasani my. Ikia zuba tsamysapyrêta — my.

Atakta bijoikpe iknyktsitsa Deus tsumuêhĩtsitsa ibo iktsa nikaranaha. Sesus tuktsa ustsya bo mopamykysokonaha, kytsa nanabyitaba sizubarêtsa bo mopamykysoikiknaha.

Sizubarêtsa ihumo sispirikporêtsa niyziknaha. Deus ity zihyrizikpowyze ispitu niyzikzo bijoikpe bo nido.

Deus tuk mynadyhyky. Iwa hỹ.

#### **Simyhyrinomyryziubyikitsa.**

**4** <sup>1</sup>Aiba tohi kytsa hyrikoso sapybara hyritywatsa harere bo hỹ mykaranaha. Asa soho hi ahabo motsasokonaha. Deus hyrikoso

mybo botu nitsaso. Kytsa hyrikoso sapybara harere piwabykynaha, Deus hyrikoso mybo mypubara ty nipamykysoko. Iwahi:

— Bykyze wastuhu kytsa Sesus humo batu sispirikpo. Sesus zerekekna. Sesus soho humo nispiriktsokdanaha. Hyrikoso sapybara humo Sesus humo nispiriktsokdanaha. Hyrikoso sapybara harere bo zuba hỹ mykaranaha. Asahi nisispihikbatakanahatsa harere humo yh̃ maha. Hyrikoso sapybara meky watu siharere ana humo hi mysihyrinymyrykynaha — niy.

<sup>2</sup> Simyspihikbatanikitsa. Hyrikoso sapybara hyritywatsa harere bo yh̃ mykaranaha. Asahi hyrikoso sapybara situk tsahi nisispihikbatakanaha. Nisimiywykynaha. Wasani ja mykaranaha batu sihyrinymyry. Batu imysapy ja batu sihyrinymyry. Paikpa mytsaty nikaranaha. Asahi siakbatsa watsa iwatsahi batu harere zikaha. Sihyritywatsa asahi batu tahapetu sisopyk. Iwatsahi wasani ja mykara batu sihyrinymyry, siakbatsa watsa. <sup>3</sup> Asahi mype nikaranaha:

— O ikia asukza byizeka wasani mykaranaha: — mybarapetu sisopyk. Mydisahawy soho humo niwatihi mype maha:

— O ikiakta siraratsani ty hauk hauk byity! — mybarapetu mykaranaha. Deus hi siraratsa ty mybo nyny niy. Myzohotsa ty nyny niy. Iwatahi siraratsa sizubarëtsa myhumo wasani my. Siraratsa sizubarëtsa tsimynasiborokonaha zeka wasani my. Ikiahatsa Sesus humo ahaspirikporëtsa iwatsahi siraratsa sizubarëtsa tsimynasiborokonaha. Ikiahatsa hi:

— O Deus ikia tsamysapyrëta ikia zuba mydisahawy ty mybo nyny tsiky — tsimykaranaha.

Iwaze mydisahawy ty haukbaiktaha myzohotsa kino niwatihi tahaborobaiknaha. <sup>4</sup> Deus suknihi ka wasaniha zuba. Iwatsahi nanabyity tsinamydisahakanaha. Iwatsahi mydisahabyitu Deus bo tsimypamykysonaha:

— O myzo ikia hi mydisahawy ty mybo nyny tsimykara. Ikia zuba tsamysapyrëta iwatsahi mykurëtsa — tsimaha. <sup>5</sup> Deus hi:

— Nanabyi nizukni wasani my. Kytsa bo wasani my — my. Mydisahawy ty tsimymydisahakanaha zeka Deus bo tsimypamykysokonaha:

— Ikia zuba tsamysapyrëta — ipe tsimaha. Iwatsahi mekywaha tu tsimymydisahakanaha.

### **Sesus Kiristu tsumuëhïtsa imysapyrënikita.**

<sup>6</sup>— O Timoteo hawa abo motsasokonaha ikia kino mytukytsa bo tytsaso. Hawa Sesus Kiristu tsumuëhïtsa tisapyrëna mykara. Atsatu tsimytsasoko — mykara. Iwaze tu ikia Sesus Kiristu tsumuëhïtsa babata tsimozik. Botu Sesus harere tsiwaby. Ana harere wasani my. Atsatu hỹ



tsimykara. Ikia kyry tsibik wata. Atahi taopuwy pezukukze taypyk. Ikia Deus harere bo hỹ tsimykaraze tsahyrinymyrēta tsmozik. Kyry tsibik taopuwy humo tsakurēta mozik. Deus harere niwatihi zatsumuēhikī. Mypowy waha. Ikia Deus harere bo hỹ tsikykara. Abaka niwatihi iharere bo hỹ tsimykara. Iwa tsimyzuruku.

<sup>7</sup>Kytsa siakbatsa harere soho ty motsasokonaha zeka waby waby byitaha. Anahi batu iakparawy my. Ana harere bo yhỹ tsimy zeka Sesus harere humo ba h̃ ziky. Iwatahi ana humo hi batu awabyhy. Ikia hi Deus hyrikoso iaksoho bo hỹ tsimykara. Iwatatu Sesus humo tsimyspirikpotohi.

<sup>8</sup>Ahanury humo ahapaikrētsa zeka wasani my. Tsimyzibytuhukutu zeka Deus harere humo hỹ tsimykaranaha zeka wasani h̃ tsimy. Iharere bo hỹ tsimykaranaha zeka wasani my iwa zeka tsimyzurukunaha. Bykyze tsimyokbabanaha zeka Deus tuk mywahi tsimynapykyryknaha. Ituk tsimynapykyryknaha mspituzo tsimaha. <sup>9</sup>Anaka iharere wasani h̃. Ana humo hi tspirikporēta h̃. <sup>10</sup>Iwatsahi tarabajaze tsimykaranaha. Katsakta Sesus humo mspirikporētsa. Sesus tawahi ispituzo atahumo kino mspirikporētsa. Katsakta itsyhyryze tatsumuēhikī tsimykaranaha iwatsahi ustsya kytsa Sesus humo sspirikporētsa. Sesus humo msyspirikpokonaha iwatsahi tahatsumuēhikīnaha tsimykaranaha. Deus kytsa sizubarētsa mysiothyryk.

<sup>11</sup>O Timoteo ana humo kino kytsa tsihyrinymyry. Ana kino kytsa tsiyepahaka. <sup>12</sup>Timoteo ikiakta apykyhyzytykta pykyhytuty. Ustsya kytsa asoho ty batu tyso:

— O Timoteo mykyryburukta wata iharere ty batu tywaby — maha.

Iwa abo batu tyso. Ikia hi wasani tsimyzuruku. Kytsa Sesus humo sspirikporētsa asahi tsiyepokzitsi. Ustsya kytsa kino niwatihi tsiyepokzitsiki. Tsimytsasoziuku. Deus humo aspirikporēta h̃. Amysapybyi ty tsimykara zeka tsmoewyhyk. Ikia wasani tsimyzuruku iwaze tu ustsya Sesus tuktsa awatsa mozurukunaha. Amy ty tsimykara siakparawy iwatsahi wasani mykaranaha niwatihi pasopykzukurunaha.

<sup>13</sup>Tsipikperykyze abo mozumu papeu tsipiny. Papeu Deus harere my. Ana papeu humo iwatahaha tsipinykyze opykani tsimytsasoko iwaze hi Deus harere kytsa piwabynaha. Asahi mozumubanhaze papeu humo iwatahaha tsipinyze. Deus harere tsimytsasoko. Sesus harere ty tsihyrinymyrykykta: <sup>14</sup>Jatuba tu Deus tazikwy ty abo nyny niy. Tarabaja humo tazikwy ty abo nyny niy. Deus sohokotsa ibo nitsasokonahaze iwa zuruze Deus tazikwy ty abo nyny niy. Sesus tuktsa nasispirikponahatsa tahatsyhyrypetsy ty aharek humo paik paik nikaranahaze, iwaze Deus tazikwy atuk nizapywy. Nasispirikponahatsa sopyk humo tahatsyhyrypetsy ty aharek humo paik paik nikaranaha. Iwa zuruze mytsatyzo tsimy. Iwa kytsa ahasopyk Deus hyrikoso humo nikaranaha. Abaka Deus zikwy atuk mynapykyryk.

<sup>15</sup>Hawa motsasoko mytsatyziu tsimy! Iwa tsimyzuruku zeka kytsa asoho tihi:

— O Sesus harere bo hyĩ mykara. Pykyhytu iharere bo hyĩ mykara — maha. Iwa asoho ty mykaranaha.

<sup>16</sup>Ikia tu pykyhytuty tsimykara. Hawa tsimysihyrinomyry pykyhytu tsimy. Iwa tsimysihyrinomyryky. Wasani tsimyzeka tsamysapyrêta tsimozik. Kytsa asahi pawabykynaha simysapyrêta moziknaha. Iwa isopyk zeka ikia Deus tuk awahi tynapykyryk. Kytsa asahi pawabykynaha asa kino niwatihi Deus tuk tahawahi mynapykyryknaha hỹ.

### Hawa Sesus tuktsa ty tsimaha.

**5** <sup>1</sup>Maku iktsaikbata imysapybyita mykara zeka betsak betsakbyity. Ituk tsimypamykysoko zuba hawa imysapybyita mykara ana humo hi tsimypamykysoko. Azo wata humo tsinakara nahawa tihi. Kytsa siypykyztytktsa bo tsimypamykysokoze atukytsa babatsa humo tsinakara naha wa.

<sup>2</sup>Wytykyryk sistsaikbaza simysapybyiza mykaranaha zeka asiza bo tsimypamykysokoze ajeza humo tsinakara naha wa tihi.

Sipyitsabyiza bo tsimypamykysoko zeka atukykyry babaza humo tsinakara naha wa tihi. Wytykyryk tsimypamykysokoze batu mytsaty ziky:

— O uta piaksetsihikik — tsimy. Iwa batu mytsaty tsimy. Ba ziksими.

<sup>3</sup>Aba haramukukaka soho motsasoko. Hawa asiza tysitsumuêhĩnaha motsasoko. Haramukukaka babaza.

<sup>4</sup>Haramukukaka sihyrytsa sispitu zeka iwatsahi tahajeza bo mysisakihikynaha! Asahi tahajeza humo simypokzitsiukrêta. Atatsa istiokata kino ipokzitsitsita moziknaha. Kytsa tatukytsa hi mysipokzitsikinaha wasani my. Deus niy:

— O kytsa tatukytsa humo mysipokzitsikinaha zeka wasani — niy: Tubabatu asahi tahahyrytsa nisipokzitsikinaha. Abaka sihyrytsa kino tahajeza mysipokzitsikinaha. Sihyrytsa tahajeza disahawy ty nyny mykaranaha. Isuk humo niwatihi ibo nyny mykaranaha!

<sup>5</sup>Haramukukaka asiza zubaza atatsa Deus bo mopamykysoikik. Atatsa ustsatsyhyryze Deus bo mopamykysoikik. Pibiyituhukutu atatsa Deus bo myzapykyikik. Unata eze kino niwatihi atatsa Deus bo mopamykysoko. Atatsa Deus humo tispirikporêtatsa. Kytsa atatsa bo disahawy ty nynyntaha! Atatsa bo isuk ty nynyntaha tsimaha.

<sup>6</sup>Haramukukaka atatsa zuba mytsaty mykara zeka batu tytsumuêhĩ. Asiza hi nawakyriki naha zuba ana humo hi mytsaty mykaranaha. Asizahi sispituze niakbakanahatsa waza batu wasani mykaranaha. Niakbakanahatsa ustsatsa batu isty tsumuêhĩ asiza ustsatsa batu isty tsumuêhĩ iwazahi niakbakanahatsa waza. Mymysapybyikinaha. Iwatsahi batu isty

tsumuēhĩ. <sup>7</sup>Amy abo motsasoko atsatu sibo tsimytsasoko. Haramukukaka situkytsa bo. Iwatsahi kytsa sizubarētsa sisoho hi:

— O asiza siza wasani mokurunaha — maha. <sup>8</sup>Katsaktsa mytukytsa isty pokzitsiu byizeka batu mysapy tsimaha. Iwa tsimykurunaha zeka katsa Sesus humo batu mospirikpo. Katsa Sesus taereke iwata mytukytsa mysopyk zeka. Kytsa Sesus humo batu sispirikpo asahi situkytsa mysipokzitsikinaha. Iwatsahi katsaktsa mytukytsa humo mypokzitsi byizeka katsa tu tsimysapybyikinaha.

<sup>9</sup>Haramukukaka sizubarēza sinaro ty papeu humo batu tywataha. Sitsaikbaza zuba papeu humo tsiptiwatahaka, asizahi humo Sesus tuktsa mysipokzitsikinaha. Iwatsahi sinaro ty papeu humo tsiptiwatahaka. Sitsaikbaza sesēta anos zuba papeu humo tsiptiwatahaka. Atatsa ibarikta estuba zubata zeka papeu humo tsiptiwatahaka. <sup>10</sup>Utsa kytsa sisoho mopamykysokonaha:

— O atatsa tsimysapyrētatsa. Nimysapywyky. Ihyrytsa kino iharere bo hỹ mykaranaha. Batu pimiyiki. Kytsa iwahoro zumunahaze atatsahi: “Pakutyny niy. Tsikadisaha my papyrytsapik” my iwa mykara. Sudeutsa sopyk ty kytsa mysiprytsapikik. Zikbyituhukutu Deus tyryktsa mysitsumuēhĩkĩ, asahi mozurukunahaze tsihokdaharēnaze atatsa kytsa mysitsumuēhĩ. Utsa kytsa tsyhyryze mymysapywyky — maha. Iwa mozuruku. Atatsa kino papeu humo tsiptiwatahaka, atatsa haramukuka babatatsa h̃y.

<sup>11</sup>Sitsaikbabyiza tu niharamukukakanahaza papeu humo tywataha wataha byitaha. Asiza siza mekta maku tuk. Kiristu tsyhyryze batu tarabaja zikaha. Maku mektatu piakse mykaranaha bo mytsaty mykara. <sup>12</sup>Atatsa hi nitsasoko zeka:

— O batu kazeky niy. Kiristu tsyhyryze zuba tarabaja mykara — niy. Bykyze maku atatsa ziaксеhyryk. Iwaze kytsa atatsa soho:

— Atatsa nitsasoko “Kiristu tsyhyryze zuba tarabaja my niy.” Aba maku atatsa ziaксеhyryk. Kiristu tsyhyryze batu tarabaja nikara maha. Taharere ty batu h̃y niy — maha. <sup>13</sup>Haramukukaka sistsaikbabyiza mowakyririknaha zuba. Nipamykysoikiknaha zuba. Siharerewabymybarēza maha. Batu sipasaratsihik. Wahoro taba zuba paikpa mynapamykysoikiknaha. Imysapybara ty zuba mynatsasoikiknaha. <sup>14</sup>Iwazahi tahapytsazonaha maha. Sitsaikbabyiza tu tahapytsazonaha zeka jokboha mytsaty mykaranaha. Tahabykyhynahaze. Tahabykyhytsa mysipupuruknahaze mysipokzitsinaha. Iwaze kytsa asahi Sesus tuktsa batu siakparawy sisoho batu siharerewabymybara. Mysukyrytsitsa haramukukaka soho batu siharerewabymybara.

<sup>15</sup>Wastuhu haramukukaka botu Sesus harere bo batu h̃y niaha. Ibase zerekiknaha. Abaka Satanas harere bo yh̃y maha. Kaharere haramukuka soho tsiptiwaby.

<sup>16</sup>Iwaze wytykyryk Sesus tuckykyryk iwa mozurukunaha. Atatsa itukytsa haramukuka zeka, atatsa kino haramukuka humo tsimypokzitsiarētatsa. Sesus tuktsa asahi mozumubanhaze atatsa humo batu ipokzitsi. Iwatsahi haramukukaka hi asizazubahaza mysipokzitsikinaha. Sesus tuktsa haramukukaka sibo zuba mysitsumuēhīkīnaha. Iwazahi haramukukaka sinamybyikiza tysitsumuēhīnaha.

<sup>17</sup>— Mymyspirikpokotsa Sesus tuktsa tysitsumuēhīziukunahaktsa! kytsa. Ahanamy ty sibo nynytaahaktsa, ahadisahawy ty sibo nynytaahaktsa! Sesus tuktsa mysitsumuēhīziukunaha zeka nynytohitaha! Asahi Sesus harere ty mymyhyrinymyrykynaha zeka asa kino ahanamy ty sibo nynytohitaha. Siharere tsiwabyziukunaha — my. <sup>18</sup>Iwa ikiahatsa ahasopyk. Deus harere botu ziwatahaka. Moises Deus harere botu ziwatahaka:

— Ahararatsa ahatsyhyryze tarabaja mykaranaha zeka isty sakiwara sakiwara byitaha iwatsahi tadisahakanaha. Ahararatsa ty pahatsumuēhīnaha zeka mytadisanaha — my. Usta papeu Deus harere tihi:

— Aty atsyhyryze pahatsumuēhīkī anamy ty ibo nynytykta! Wasani my. Iwatsahi nasispirikponahatsa Sesus tuktsa ahanamy ty sibo nynytaahaktsa. Sesus tuktsa sizubarētsa tahanamy ty nasispirikponahatsa bo nynytaahaktsa! — tsimaha.

<sup>19</sup>— Estuba maku Sesus tuktsa myspirikpokotsa soho tsiharerewabymybarēta zeka ba ziwaby. Atahi:

“O myspirikpokotsa imysapybyita nikara” my. Ana kino ba ziwaby. Kytsa petoktsa myspirikpokotsa soho motsasokonaha zeka:

“O imysapybyita nikara” maha. Wabytahaktsa. Kytsa harakykbyihi myspirikpokotsa soho motsasokonaha zeka:

“O myspirikpokotsa imysapybyita nikara” maha. Asa kino wabyziutaha tsimy — my. <sup>20</sup>Myspirikpokotsa Sesus tuktsa pisapybyi zeka myzubaha okzetu tsibetsakaknaha. Imysapy byizeka batu pykzeky iwaze kytsa sizubarētsa okze tu tsibetsakik. Ibo tsipibetsak zeka ustsá myspirikpokotsa sipybyrētsa maha:

— O katsa kino niwatihi tabetsakiknaha — maha. Iwatsahi sipybyrētsa. Imysapybyitsa mykaranaha humo sisikpybyrētsa.

<sup>21</sup>O Timoteo kaharere bo hyĩ tykta! Ana hi papehaka atsa tyty tsimy. Deus kaharere piwabyky Sesus Kiristu niwatihi kaharere piwabyky. Bijoikpe iknyktsa asahi Deus nisiwatawyky kaharere piwabykynaha, sizubarētsa kaharere piwabykynaha ape ikykara naha ty piwabykynaha. Iwatahi myspirikpokotsa atsawatu asopyk. Ba ziktsaso:

— O atakta maku kaharereziuwy kapokzitsikitsa ihumo batu kasakpare. Usta maku imysapy byita zeka tsipibetsak! — my. <sup>22</sup>Maku

myspirikpokotsa mozikze atsyhyrypetsa ty iharek humo paik tsimy. Iwa tsimy mysopyk ty zuba. Pykyhytuty. Ikia ahyrizik watuty atsyhyrypetsa ty maku harek humo paik tsimy. Utsa kytsa simysapybyitsa mykaranaha zeka ikia batu. Ba situk zikasapy. Atazuba mozik zeka bazimy. Tsimysapyrêta tsmozik.

<sup>23</sup>O Timoteo pihik baba ty zuba ba tsõ tsimy. Ahakuki tsapyri myzibyituhukutu iwatahi duabohotsa tsik tsipiku. Myhakoki hwi waha duabohotsa tsik ty tsõ tsimyze iwaze ahakuki jokboha mozik.

<sup>24</sup>Wastuhu kytsa sizubarêtsa okzeka pisapybyikinaha. Kytsa sizubarêtsa simysapybyitsa nikaranaha ana soho humo sihyrinymyrêtsa. Deus mysisininiwyky ana humo hi sihyrinymyrêtsa. Utsa kytsa pisapybyikinahaze kytsa papatu mykaranaha iwaze kytsa simysapybyitsa mykaranaha soho humo batu sihyrinymyry. Aibani zuba kytsa simysapybyitsa nikaranaha soho humo sihyrinymyrêtsa. <sup>25</sup>Iwaze wastuhu kytsa sizubarêtsa okzeka simysapyrêtsa nikaranaha. Kytsa sizubarêtsa amy tisapyrêna maha ana soho humo sihyrinymyrêtsa. Utsa kytsa simysapyrêtsa mykaranahaze kytsa papatu mykaranaha. Tisapyrêna hi piokpitsikînaha. Abaka batu aty tohi hawa simysapyrêtsa mykaranaha sihyrinymyrêtsa. Aibani zuba kytsa hawa tisapyrêna nikaranaha ana soho humo sihyrinymyrêtsa hÿ.

**6** <sup>1</sup>Sesus tuktsa asahi mysitsumuêhikînaha okyrysaro perykytsa batu sibo nyny ziky. Iwatsa tu nisitsumuêhikînaha zuba. Asahi maku sitsihitsa wasani sisopyk maha iwa sihumo tsimy. Iwa ihumo sisopyk zeka kytsa Sesus humo batu sispirikpo.

— O Deus harere bo wasani my — mykaranaha, ahahumo Deus harere bo wasani my mykaranaha. Myhyrinymyrywy batu amy tohi siharerewabymybara maha. Iwa sihumo tsimy. <sup>2</sup>Wastuhu Sesus tuktsa tahatukytsa humo nisitsumuêhikînaha. Utsa Sesus tuktsa sihumo sitsihitsa niyziknaha. Iwatsahi batu tyso:

— O atakta Sesus tukta niwatihi. Iwatahi iharere bo batu hÿ — my. Iwa batu tyso. Ikia ispe tsimy:

— Asa bo hi tysitsumuêhînahaktsa Sesus tukta niwatihi iwatahu tsitsumuêhînaha. Ata maku Sesus humo tsimypokzitsiarêta iwatsahi tsitsumuêhînaha — tsimy. Timoteo ana humo hi tsihyrinymyryky. Sesus tuktsa tsihyrinymyryky:

— Tsisapybakanahaktsa! tsimy. Iwa tsimyzurukunaha tsimy. Sesus humo tsimypokzitsiarêta iwatahi tytsumuêhînahaktsa! — tsimy.

Iwa tsimyzurukunaha.

### **Sesus spirikpowy tsihyrinymyrykta.**

<sup>3</sup>Sesus Kiristu mypehakatsa iharere wasani my. Aty iharere bo hÿ my zeka Deus hi:

— O atakta tsimysapyrêta — my. Aty tohi meky watu mysihyrinymyryky zeka Sesus harere humo batu ihyrinymyry. Iharere batu iakparawy.

4— Katsa zuba myhyrinymyrêtsa tsimaha — maha. Mahani ba. Sihyrinymyrybyitsa tu sisopyk. Myharapepehakanaha zuba. Sizokdirêtsa. Mopamykysoikiknaha zuba. Siharerewabymybarêtsa maha. Utsa kytsa soho humo myharape ziubyikinaha. Iwazeka simytsatyharêtsa moziknaha. 5Kytsa tuk mopamykysoikiknaha zuba. Sesus Kiristu harere batu siakparawy. Iharere pimiyikinaha. Iwa mytsaty mykaranaha.

— Katsa Deus humo tsimyspirikponaha zeka mynamyrêtsa tsimoziknaha — mytsaty ahabyitsa zikaha. Iwa tahape tu sisopyk mybarapetu mykaranaha. 6Sesus tukta tsinamyrêta wata. Deus humo tsinamyrêta wata. Mynamyrêtsa zeka mydikrêtsa. Mynamy tsikaeni zikino mydikrêtsa. Deus mytuk mynapykyk iwatsahi mykurêtsa. Takino tsimysapyrêta hÿ. 7Katsa tsikpupuruknahaze batu mynamykyryk. Iwa tsimyhyrikosokdanahaze batu amy tohi ty mytuk wabehyryk zikaha. Katsa zuba Sesus mymyoktyhyryk. 8Iwatsahi mykurêtsa. Katsa mydisahawy mysuk iwaha humo mykurêtsa. 9Kytsa tihi:

— O kanamy tsizubarêna zeka kakparawy, okyryсарowaka kino niwatihi kakparawy. Kanamyrêta mozik hÿ — my. Asahi okyryсарo mysisapybyikinaha. Amo batu sapy my okyryсарo soho humo mykaranaha. Asahi siraratsa watsa maha. Sirara tsaraparêta zeka tawerykywy bo mynatsuk. Anaeze mora. Iwa maku tahi:

— O uta kanamyrêta hÿ — my ta kino okyryсарo humo amy ty imysapybyitsa mykara. Bykyze tisukatsihikrêta mozik. Sinini ykarawy bo ba zikzoizo. Hawa siraratsa tawerykywy bo ba zikzoik atahi sinini ykarawy eze ba zikzoik. Deus tuk ba ziktasapy. 10Asahi okyryсарo humo simysapybyitsa mykaranaha. Asahi okyryсарo siakparawy iwatsahi Sesus humo batu sispirikpo. Sesus soho humo nispiriktsokdanaha. Okyryсарo tsizubarêna ziaксеkenaha. Sisukatsihikrêtsa nikaranaha. Sispirikpobyitsa tu sisukatsihikrêtsa nikaranaha.

#### **Abaka Timoteo ikia bo zuba motsasoko.**

11O Timoteo ikia hi Sesus tukta babata tsimy. Iwatahi amo imysapybara humo tsimoewykta! Wasani tsimyzuruku. Deus harere bo hÿÿ tsimykara. Deus humo tispirikpoziurêta. Utsa kytsa tysipokzitsikikta. Kytsa humo batu apyby. Sinini tsimykara zeka tsapunihikrêta tsimozik. Batu tyso!

— O uta zuba myhyrizikwanita — iwa batu tyso. Utsa kytsa harere bo wabyziuty. 12Timoteo Sesus humo tispirikpoziurêta tsimykta! Kytsa asahi motururukiknahatsa watsa. Sipaikrêtsa moziknaha. Ikia siwata tsimozik. Ikia Deus bo zuba mytsaty tsimykara hawa kytsa motururuknaha

iwaze aty tapara pomo tawata. Ikia hi Sesus humo tsaspirikporêta babata iwatahi tsapunihihrêta tsimozik. Sesus humo tsaspirikporêta hỹ. Tsimyhyrikosokda zeka Deus tuk awahi tsimynapykyryk. Ikia kytsa sizubarêtsa okze botu nitsasoko:

— O utakta Sesus harere humo mospirikpoko — tsiky. Iwa kytsa okze tsiktsasoko. Iwaze Deus zawatawy. <sup>13-14</sup>Sesus Kiristu harere bo hyỹ tsimykta! Iwaze batu amysapybyita tsimykara. Sesus asoho humo batu amysapy ziky. Sesus harere humo zuba tsimyzuruku, mekywaha myharere bo ka ba yhỹ tsimy. Sesus Kiristu myziksizoze mymyoktyhyryk. Atahi tsipiperykyze wasani tsimyzuruku. Ana hi motsasoko, Deus okze tu abo motsasoko. Sesus Kiristu okze tu niwatihi abo motsasoko. Deus kino kytsa abazubatsa ihumo sispitu. Siraratsa sisarakatsa kino niwatihi ihumo sispitu. Sipehakatsa niwatihi ihumo sispitu. Iwaze Sesus Kiristu tsipunihihrêta batu ipyby. Sipehatsa Pôtios Piratus iokeryk tu amy ty wasani my atsatu nikara. Batu ipokso ipybybyita ziknakara wasapeha ty zuba nikara.

<sup>15</sup>Deus mozihikik zeka Sesus mybo myzipeha iwa mybo myziksizo. Deus tsimysapyrêta mykara. Atahi zuba abazubata. Utsa pehatsa iharere bo hyỹ mykaranaha. Ata pehatsa kino myhyrizikwani my. Deus zuba mytsihitsa kytsa sizubarêtsa humo sitsihitsa my.

<sup>16</sup>Katsa tsimyhyrikosokdanaha. Deus koikny baktatu. Tawahi mynapykyryk. Amy skaraba tisapyrêna ihumo zuba tisapyrêna. Isapy haramwe jekwaha humo tisapyrêna. Haramwe bo iktsa tsimy zeka batu isapy iwa zeka ihumo tisapyrêna zuba motare. Iwaze katsakta ituk ahabyi zeka hawa haramwe bo batu iktsa tsimaha katsa mymysapybyiri humo ba ibo iktsa tsimaha. Katsa batu ibo iktsa zikaha. Mysapybyitsa tsimykaranaha zeka ba ituk tsimynapykyryknaha. Katsakta iharere bo hyỹ tsimahaze mekywatsa tu tsimoziknaha. Ihumo ahamysapyrêtsa tsimoziknaha iwatsahi iharere bo hyỹ tsimahaktsa kytsa! tsimaha. Iwatsahi katsa tihi:

— O Deus ikia zuba wasani tsimykara. Ikia zuba tsamysapyrêta. Myhyrizikwanita awahi tsimynapykyryk. Azikwy kino niwatihi atuk awahi mynapykyryk — tsimaha. Iwa ibo tsimypamykysokonahaktsa kytsa.

<sup>17</sup>Timoteo Sesus tuktsa asahi sinamynikitsa pe tsimy:

— O sinamynikitsa batu tyso “O katsa zuba myhyrizikwanitsa tsimaha.” Ahanamy byizeka sa hawa tsimaha Ahanamy humo tsikaeni zuba ahakparawy zeka. Deus humo tusprikpokonahaktsa! Atahi mynamykusukniki. Amo wasani my anaty hi mybo nyny my — tsimy.

Iwa sibo tsimy:

<sup>18</sup>— Utsa kytsa tysipokzitsikinahaktsa. Sibosapisybanahaktsa! Ahanamy utsa bo tsibiakaknahaktsa! Iwa sinamynikitsa bo

tsimypamykyso. <sup>19</sup>Ahanamy ty nyny tsimaha zeka, usa ahanamy ka Deus baze tu mynapykyryk. Ahanamy mekywaha tu Deus baze tu maha, anaeze tawahi ahanamy mynapykyk. Iwaze ikiahatsa Deus tuk ahawahi tsimynapykyryknaha hỹ — tsimy.

Iwa Timoteo ikia sinamynikitsa bo tsimytsaso.

**Aba nepyk.**

<sup>20</sup>— O Timoteo Deus harere bo hyỹ tsimykarakta! Pykyhytuty iharere bo hyỹ tsimyкта! — my. Kytsa asahi Deus harere humo batu siakparawy sibo batu motsaso. Tsikaeni zuba sibo tsimypamykysoko. Siharerewabymybarẽtsa maha. Asa hi:

— Katsa zuba myhyrinyrẽtsa — mybarapetu mykaranaha. Situk ba zikmysapynaha. <sup>21</sup>Kytsa siharere piwabykynahaze sibo yhỹ mykaranaha. Iwatsahi Sesus humo batu sispirikpo. Sesus zerekiknaha siharere humo. Iwa my.

**Deus pahasapywyky.**

Aba ikia pe Deus kino ahumo tsimypokzitsiarẽta Sesus tuktsa sihumo mysipokzitsihiki niwatihi. De.

Pauro